

## PLAN RADA EKO FORUMA ZA 2020. GODINU

Kako je osnovni zadatak udruženja obezbjeđenje uslova za normalan rad, prioriteti u planiranju su podređeni tom cilju.

1. Jedan od dugogodišnjih problema u radu udruženja bilo je obezbjeđenje kancelarijskog prostora koji udruženje može finansirati. S obzirom da smo uspjeli preživjeti protekle godine uz skromna sredstava ostvarena realizacijom projekata, uspjeli smo i pokriti troškove zakupa prostora, iako je to postajao sve veći problem. Na sreću, ostvarenjem našeg dugogodišnjeg cilja, tj. dobijanjem statusa Arhus centra u Zenici u decembru 2019.g. riješili smo kvalitetno i prostor za aktivnosti udruženja. Uz inicijativu i podršku kancelarije OSCE za Srednju BiH u Travniku, gradska uprava Zenice nam je izašla u susret i dodijelila besplatno na korištenje kvalitetan prostor na lokaciji Talića brdo 11, u centru Zenice. Ugovor o iznajmljivanju prostora je na 1 godinu sa mogućnošću produžavanja svake godine što će se vjerovatno i desiti. Za prostor se za sada ne naplaćuje zakupnina, uz obavezu plaćanja svih ostalih komunalnih troškova. Također smo dobili i materijalnu pomoć od OSCE-a u vidu 2 kompleta računara, reklamnog i kancelarijskog materijala, na čemu smo im zahvalni.
2. Radi obezbjeđenja sredstava za funkcionisanje udruženja, Eko forum se intenzivno posvetio prijavama na raspisane konkurse za dodjelu projekata. Jedan od prvih dobijenih je projekat "Analiza realizacije KEAP ZDK", u okviru EKO BiH mreže, kojim koordinira Centar za životnu sredinu iz Banja Luke. Realizacija je započela tokom januara 2020. i trajat će čitavu 2020.g.
3. Tokom 2020.g. planirano je okončanje projekta sa fondacijom PeaceNexus (Inkluzivni dijalog s biznisom), predstoji još nekoliko sesija sastanaka sa svim akterima tokom godine.
4. OSCE planira nastaviti s podrškom radu Arhus centra Zenica, ali još nisu definisani načini podrške, osim planiranog treninga za jačanje kapaciteta udruženja u martu i aprilu 2020.g.
5. Eko forum je poslao prijave na objavljene pozive za finansiranje projekata Ambasade Češke, UNDP i Ambasade Norveške, Grant za zagovaračke mreže CPCD, Eko hubs CPCD, UNDEF, i realno je očekivati da nam bude odobreno još projekata što će obezbijediti stabilno finansiranje djelatnosti EF. Moramo priznati da smo dobijanjem statusa Aarhus centra dobili mnogo više šansi za dodjelu projekata, pa smo neke pozive već i odbijali zbog nedostatka kapaciteta, prvenstveno članova EF koji mogu raditi aktivno na projektima.
6. Imajući u vidu naprijed navedene činjenice, jedan od najvećih zadataka EF je omasovljenje članstva i uključivanje mladih, školovanih osoba koji bi se mogli i aktivnije uključivati u naredne projekte. EF je za realizaciju projekta sa CZŽS iz Banja Luke objavio javni poziv za prijavu zainteresovanim osobama i kao i obično, odziv je bio skroman. Ipak se prijavilo desetak kandidata, koje smo uključili u proces obuke i treninga na realizaciji projekta i nadamo se da smo time pokrenuli makar i simbolično, i proces revitalizacije i podmlađivanja članstva.
7. Realizacijom nekih od projekata, namjera je EF dodatno opremanje specifičnom opremom kojom bi kontrolisali i mjerili neke od polutanata ili faktora zagađenja okoliša, koji se trenutno ne mjere ili ne prate na našem području.
8. U našim redovnim aktivnostima praćenja realizacije okolinskih dozvola za postrojenja kompanije ArcelorMittal Zenica, u prvi plan nam dolazi sudbina postrojenja Koksare, kojoj

je istekao tehnički vijek trajanja i posebno zbog njenog statusa i značaja za rad budućeg novog sistema zagrijavanja grada plinskom toplanom. Shodno predviđenim planovima puštanja u rad ovog postrojenja krajem 2020. aktuelizirat ćemo posebno kontrolu i mjerenje emisija organskih polutanata pri funkcionisanju nove toplane, uz napomenu da studija nultog stanja za ovo postrojenje uprkos postavljenim obavezama u okolinskoj dozvoli nije urađena.

9. Jedan od prioriteta je i situacija s deponijom Rača koja nije ni blizu rješenja statusa. Još uvijek radi bez okolinske dozvole, vlasništvo nad zemljištem je predmet spora između grada i kompanije, i ne zna se ko je odgovoran za eventualne nesreće koje bis e mogle desiti usljed nedostatka održavanja i upravljanja ovom nelegalnom deponijom.
10. S obzirom da su članovi Eko foruma bili i aktivni učesnici u EBRD projektu ZENICA GREEN CITY, te da počinju aktivnosti na realizaciji projekta otpadnih voda grada Zenice, Plinske toplane Zenica, Projekta Plava voda, Projekta energetske efikasnosti – utopljanje objekata, Rekonstrukcija KBZ, uvođenje plina i postavljanje distribucione mreže, itd. nastojat ćemo aktivno pratiti sve ova dešavanja i dati konstruktivan doprinos svemu tome.
11. Neki od velikih i nedovršenih okolinskih projekata kao što su registar zagađivača ZDK, otvaranje i puštanje u rad Centra za monitoring okoliša na Institutu "Kemal Kapetanović" daleko su od završetka i nastojat ćemo pratiti realizaciju ta dva važna projekta.
12. Dobijanjem statusa Arhus centra, naša obaveza postaje i dodatna edukacija građana u ostvarenju njihovih prava, dobijanja svih traženih informacija i pravne pomoći u problematici u koju je uključena zaštita okoliša.
13. Sve ostale aktivnosti koje smo u proteklim vremenima redovno navodili kao zadatak i obavezu naravno ostaju i dalje na snazi.
  - saradnja sa svim ekološkim i građanskim udruženjima, institucijama, organima vlasti, kompletnim civilnim sektorom, zajedničko i usaglašeno djelovanje i uvezivanje,
  - saradnja sa medijima svih vrsta jer je to jedan od osnovnih načina djelovanja,
  - internacionalizacija problema zaštite okoliša u BiH,
  - organizacija i aktivno učešće u ekološkim akcijama, pokretima, manifestacijama,
  - jačanje saradnje s međunarodnim organizacijama, fondacijama, udruženjima,
14. Očekujemo da ćemo konačno tokom godine dobiti i odluku Tužilaštva ZDK, koja je vraćena na ponovno razmatranje iz Federalnog tužilaštva i da ćemo shodno tome donijeti i odluku šta dalje raditi u tom čitavom lancu podnesenih prijava.
15. I na koncu, ako je nešto i propušteno u ovom planu, Eko forum ostaje pri namjeri da radi i djeluje u najboljem interesu građana ovog grada i šire. Imamo osnova da budemo optimisti jer smo ovu godinu započeli u puno boljoj poziciji i situaciji nego prije, uz našu veliku želju da naš rad bude shvaćen i prihvaćen kao rad koji je u vitalnom interesu građana ove napaćene države. S te strane očekujemo i podršku kroz omasovljenje u uključivanje u naš rad što većeg broja građana, pogotovo mladih osoba.

U Zenici, 21.2.2020.

predsjednik udruženja Eko forum Zenica  
Zlatan Alibegović